



Banjir kilat: 2 kereta terkandas

KUALA LUMPUR 1 Dis. - Hujan lebat yang melanda ibu negara sejak pukul 5 petang ini mengakibatkan dua buah kereta terperangkap dalam banjir kilat yang berlaku terus berlaku di Jalan Chan Sow Lin, berhampiran stesen transit aliran ringan (LRT) di sini hari ini.

Dua buah kereta tersebut iaitu Volkswagen GTI dan Perodua MyVi diliputi banjir sehingga setengah badan apabila pemandu kenderaan tersebut masing-masing tidak menyedari kawasan jalan sepanjang kira-kira 100 meter itu telah dinaiki air setinggi 0.3 meter.

Seorang daripada pemilik kereta itu, Lee Xin Yee berkata, kereta Volkswagen miliknya tiba-tiba mengharungi banjir kilat yang dalam dan tanpa disedari air mula masuk sedikit demi sedikit.

“Ketika kejadian, hujan lebat dan saya dalam perjalanan pulang ke rumah sebelum kenderaan saya terperangkap dalam banjir kilat.

“Saya tidak sedar tiba-tiba laluan berselekoh di bawah jambatan ini dinaiki air banjir yang tinggi. Tanpa membuang masa, saya segera keluar dari kereta untuk menyelamatkan diri,” katanya ketika ditemui pukul 6 petang ini.

Sementara itu, skuad penyelamat Dewan Bandaraya Kuala Lumpur (DBKL) mengambil masa kira-kira sejam untuk mengeluarkan kedua-dua kenderaan itu dari kawasan banjir.

Beberapa anggota polis trafik turut kelihatan di tempat kejadian bagi mengawal keadaan lalu lintas ekoran jalan tidak dapat digunakan.

ANGGOTA skuad penyelamat DBKL berusaha menarik keluar sebuah kereta Perodua MyVi yang terkandas dalam banjir kilat yang berlaku di Jalan Chan Sow Lin, Kuala Lumpur, semalam.